

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA FEPUARI 2024

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 29 - website: [www.cccs.org.ws](http://www.cccs.org.ws)

## MAOTA GALUEGA EFKS KETESEMANE FOU



O le Faletua o le Afioga i le Ta'ita'ifono o le Fono Tele, Tamara Esera na ia 'o'oti le lipine e tatala aloaia ai le Maota o le Galuega, EFKS Ketesemane Fou, Pulega Faleata Sasa'e, Matagaluega Faleata. O le Toeaina Faatonu, susuga Misipalauni Faatau FT o loo tatala faitoto'a o le maota, a o sauni le susuga Tautua Aurelio FT, mo le ta'ita'iina o le sauniga e faapa'ia ai le galuega, 10 Fepuari 2024.



---

# FAASINO UPU

- |                                   |    |
|-----------------------------------|----|
| 1. OLE LAUGA                      | 2  |
| 2. A'E LE KOLISI FAAFAIFEAU MALUA | 4  |
| 3. LAUGA O LE SAUNIGAA'E MALUA    | 5  |
| 4. OLE PEROFETA MULIMULI          | 8  |
| 5. NA O AFIOGAE TULEI MAI         | 12 |
| 6. ATA O GALUEGAA LE EKALEZIA     | 16 |

## O LE LAUGA

Tusi Faitau: Neemia 1:1-2:10

Matua: Neemia 1:4, *“Ua ou faalogo i ia upu, ona ou nofo ai lea i lalo, ma ou tagi, ma faanoanoa i nisi aso, ma anapogi, ma tatalo i luma o le Atua o le lagi.”*

Neemia 2: 4 – *“Ona faapea mai lea o le tupu ia te au, se a ea le mea e te manao ai? Ona ou tatalo atu lea i le Atua o le lagi...”*

Manatu Autu: O LE MANA O LE TATALO.

A i ai se mea e manatua ai Neemia le atalii o Hakalia i le Tusi Paia, e manatua i le toe fausiaina o pa o Ierusalem. Le nuu sa sili ona faapelepele ma sapaapai faapepe i aao o le Alii, a ua faatafuna'iina ma puleesea e le malosi faafitafita, ona o le agasala ua suamalie. E molimau le Tusi Paia i le ogaoga o le toasa o le Atua na oo i le nuu, na afua ai ona faataapepeina ona tagata. O nisi ua fasiotia, o nisi ua ave faatagata o taua, e faapologa ma faatigaina, ona o le faalogogatā i le Atua. E oo lava i le pa na siomia ai le aai ua soloia ma faatafunaina. Le pa na fai ma mitamitaga e malu ai ma saogalemu ai le nuu mai ona fili, ua soloia ma faaleagaina. O mea e lē tutupu fua. E moni ai upu a le atunuu, 'E lē falala fua le niu.' E i ai lava mafuaaga o mea uma. A e pei ona silafia,

na mafua lava ona o le agasala ua taumasuasua. Ua gaseā le Atua e onosa'i, faapalepale ma a'oa'i ma faatonu i ala faigofie, peitai, e le'i lagona lava e le tagata le uiga o le avea o ia ma palealii o galuega mamana a le Atua. Fa te ia, o ia o le tagata saoloto, e leai ni alafua e limataitaiina ai le ola. Peitai, o loo manino lava le finagalo o le Atua i le amataga. E fai a'u mo outou Atua, e fai outou mo'u nuu.

O lona uiga, o le saolotoga o loo i ai tulafono ma aiaiga e tatau ona uia mo le manuia o lena feagaiga. Ae ua a nei? Talofa e, ua tuu ma'a, a e maa i aau. Ua galo nimo le Atua soifua, a e ua ifo ma tapua'i i atua mamate. Ua faasili le alofa ia te ia lava, a ua faaititia po ua leai foi se alofa i Le na muai alofa mai. O la le Tusi, e tatau le ta i le tua o le vale. O le ala lea o le oo mai o le toasa o le Atua. I lona lava finagalo alofa, ia avea le faatafunaina ma le puleesea o se auupega se'ia a'oa'oina atili le tagata agasala. O lona faamoemoe mauuluga, ia suia le tagata tuai i se tagata fou. Ia suia le faalogogatā i le faalogo gofie, o le loto tete'e i le loto e peiseai o se eleele lelei, e pa'u i ai le fatu o le alofa e tupu ma atagia i le olaga o aso uma. A o le fesili tele lea, o ai la se isi e mafai ona tulai mai e toe atia'e le nuu ua faatafunaina? O ai se toa ma se malosi e mafai ona ofo ane le soifua seia toe atia'e pa o Ierusalem?

O le valaauina lea o Neemia e pei ona manino i le Tusi Paia. O le tautu uaina a le tupu o Aretaseta. O se galuega e faamoemoeina ma sailigata se isi na te faia auā o loo ia te ia ola ma le oti o le tupu. O le uiga o manatu, a faaona a e Neemia le uaina e oti ai le tupu, e oti a. A e faauta i le faamaoni o lenei atalii, e le'i tupu se na mea. A e sa tautua lava ma auauna i le faamaoni e gata ai le malosi. A o lena faamaoni o Neemia, sa le'i galo ai ia te ia lona faasinomaga. E ui ina ia mautinoa, o loo pologa ona tagata i pulega a Aretaseta ma le malo o Peresia, peitai sa le'i avea lena ma ala e tuuititia ai le faamaoni o Neemia i lona valaauina e fai ma tautu uaina a le tupu.

O le manatua pea e Neemia o lona nuu ma ona tagata, na afua ai ona fesili: pe faafefea sa Iuta, o e na totoe o le tafeaga, i le ma Ierusalem? O le fesili o le alofa, e manatua ai Afia i si ona vao. A

---

e talofa i le tali ua oo ane: ua tele le puapuaga ma le gaogaoina o i latou, ua soloia foi le pa o Ieruselema, ma ua mu ona puipui i le afi. O se tala e talia gatā, auā o lea ua manino le leai o se faamoemoe ola o totoe i le nuu. Ua faatafuna'iina mea uma. Ua leai foi se ola o toe i ai. Peitai, e lei aveia ia tala faamomoi loto ma tala e vaioa ai le alofa moni o Neemia i lona nuu. Fai mai le Tusi faitau, sa lagona le faanoanoa, sa tagi ma tutulu loimata ona o le alofa, a ua leai se mea e mafai. Ua masaa le ipu vai. Ua oo i ai le toasa o le Atua. A o ia tiga o Neemia ma lona faanoanoa, o loo sili ona mu tele ai le lamepa o le loto faatuatua i lona Atua Soifua. O le ala lea o le tatalo ma le anapogi, e pei ona ta'ua i upu o le matua: *“Ua ou faalogo i ia upu, ona ou nofo ai lea i lalo, ma ou tagi, ma faanoanoa i nisi aso, ma anapogi, ma tatalo i luma o le Atua o le lagi.”*

O le fesili, aisea ua muai saili ai Neemia i le anapogi ma le tatalo i le Atua? (1) O Neemia o le tagata faatuatua i le Atua. (2) O tulafono a Metai ma Peresia, o tulafono e le tatalaina i se isi lava mea. E oo lava i le tupu, e le mafai. A ua tusia loa ma faamaufaaailogaina, o tulafono lava na e oo i le faavavau. O le mafuaaga lena o le anapogi ma le tatalo o Neemia. Ua le saili ai i sona mafai faa-uauna faamoemoeina i le tupu, a e ua ala saili i le Atua mo se tali.

Ua silafia lelei e Neemia i mata o le faatuatua, o lea lava le auupega e matalatala ai noanoataga uma, o le tatalo. O faitotoa ua tapunipuni ma noanoatia i filifili uamea, e matalatala lava i le tatalo ma le anapogi. Molimau le vaega lona lua o le matua i le tali na aumai e le Atua: Neemia 2: 4, *...se a ea le mea e te mana'o ai?* O se fesili e le tataui se tupu ona fesiligia ai sana auauna. Aua a fai fesili nei, a e tali mai Neemia, ou te mana'o e faasaoloto uma tagata a e ave lau masiofo e faapologa, o le a la se tali a le tupu? Faamata na te talia pe leai? Afai e fai ua lelei, a e afai e leai, o lona uiga, ua pepelo i ana upu.

O le uiga lea o manatu, e le tataui ona fesili faapea se tupu i sana auauna. A e faauta ia Aretaseta ma le mea ua na fai! O le fesili faatupu manatu, o fea e tupuga mai ai lena fesili manaia i le faalogo? A o fea foi e afua ai nei lagona alofa ua faaosofia ai se tupu e le talitonu i le Atua? O le tali a le

lauga: **o le mana lena o le tatalo.** O mea e faigata i le vaai ma faigata i le faalogo, o ala foi o loo fola i le maa tui ma le maa faalavea aao, e saogalemu ma uia gofie ona o le Mana o le Tatalo. O le tatalo e faia ma le loto atoa, e le masalosalo pe faalotolotolua, a ua faia ma le faatuatua.

Fai mai le faaiuga o le matua, Neemia 2: 4, *“ona ou tatalo atu lea i le Atua o le lagi.”* O le a lena tatalo ua toe fai? O le tatalo faafetai, faatasi ai ma le faanaunau pea i le Atua, ina ia taitai pea le faamoemoe seia faataunuuina. O nei aso, o le isi lea vaivaiga masani o le soifuaga. E fiafia e tatalo ma augani mo se faasinomaga o mea fai, ae mulimuli ane ua galo se faafetai i le Atua. A le o lena foi, ua faia lava mea uma i lona malosi ma lona iloa. Faauta i le soifua o Neemia, na amata i le tatalo lona faamoemoe. Faanōnō manū mo se fesoasoani e mafai ai ona faigofie se faaiuga a le tupu ma lana masiofo. Lea ua lafoia ataata o tauleleia. A e le'i gata ai iina. E lei galo ia te ia Tāē i atuā. Na manatua le Atua. O le ala lea ua toe tatalo ai i le Atua o le lagi. I le ma le isi, o le tatalo ina ia fa'aauau pea le ta'ita'i mai o le Atua i lona faamoemoe.

O loo manino lava i le tala na faitauina, le tele o tapenaga na moomia e Neemia mo lana malaga toe foi i Ieruselema. O tusi e faataga ai lona sopoia o le faitotoa o le aai, ma ona tuaoi. O tusi e ave i ta'ita'i ma tagata eseese o loo pulea vaega o le malo na moomia uma. O mea ia e faigata ona faamatu'u atu e se tupu mo sana auauna, a o lea ua faafaigofie mea uma, ona o le MANA O LE TATALO.

O le toe faamanatu lea i lou soifua ma le tatou ola talitonu i le Atua. O le tatalo o le auupega lea a le Kerisiano e faigofie ai lana savaliga. O a lava faafitauli ma mea e tutupu i le olaga lena e lofia ai i lagona o le masalosalo ma le mautonu. O le tatalo lava le tali. Tatalo ma le faatuatua, e leai se mea e faigata i le Alii. Silasila foi, o tulafono a Metai ma Peresia, e leai se malosi na te suia. Lea ua tatou faitau ma a'oa'oina, na suia ona o le mana o le tatalo.

Ua vaai ma faalogo ma le alofa i nei aso, i lo tatou si'omaga, ua le masino se ala e toilalo ai le tagata i le fili ma ana faiga. O le tele o suiga ua i

---

ai le lalolagi, o suiga lava o loo i ai faatasi le lelei ma le leaga. A o le tatalo Samoa e, o le mafai lea na te faamatalaloto suiga e lelei e tatau ona talia ma fa'aaoga, o le tatalo foi na te faailoa i suiga e le lelei, e tatau ona teena ma puipui mai ai lo tatou siosiomaga. O le upu moni, ua moomia ni Neemia latou te atia'e aiga, nuu, le atunuu ma le Ekalesia ua tauau ina faaleagaina e le fili ma ana faiga. Peitai, e le mafai ona tatou faia o ni mea lelei, pe afai e aunoa i tatou ma le Atua. Silasila foi ia Neemia, o lona toe foi e ati a'e pa o Ierusalem, e le o se galuega sa faigofie. A e na tupu lona malosi, ona o le Atua sa fesoasoani mai e ala i ana tatalo. O le tatalo lava ma le faatuatua faamaoni i le Atua, e mafaia ai o soo se mea.

O le i ai o Iesu Keriso i Lana galuega i le ola lenei, na tua lava i le tatalo. E moni lava o Ia o le Alo o le Atua, a e iloga lava ituaso e mapu ane ai le Alii mo lana tatalo. E tiga le fetuleni ane o tagata ma tele galuega fai, a e sa le'i vaioa ai lava le soifua tatalo o le Alii Faaola. Lea lava na oo a i ona toe taimi, na tatalo lava. Peitai, tatou te faalologo pea ma faatalitali i le finagalo o le Atua tatou te ola ai.

E tatau foi ona faapea lo tatou ola mafuta atu i le Atua. O le a lava le pisi ma le tele o galuega, ia i ai lava se taimi e tatalo ai i le Atua o le lagi, le Atua silisili ma le mata'utia e pei foi ona tatalo o Neemia. Ia toaga e tatalo, ma ia manatua – E IAI LE MANA O LAU TATALO, MALA'U FOI. Ona o Iesu. Amene.

**Saunia: Susuga Enoka Aperamo FS,**  
**EFKS Papa Puleia, Palauli**  
**Matagaluega FAASALELEAGA**

O le **ASO LULU O LE LEFULEFU**, na pa'u i le Aso Lulu, 14 Fepuari 2024. O le Aso lea e amata ai le Vaitau o le LENI, po o le vaitau o Mafaufauga Loloto (i le Tusi Paia), o Talosaga ma Anapogi. E 40 aso o lenei tau, amata lona faitauina mai le Aso Lulu o le Lefulefu seia oo i le Aso Toonai Paia (o lumana'i le Toetu), a e le faitaulia ai Aso Sa taitasi. O le 40 aso e atagia ai le 40 aso na faaososoina ai lo tatou Alii o Iesu i le vao, ma na Ia manumalo ai. O le Manatu Autu o le Tusi Faitau Aso o le Aso Lulu o Lefulefu: **O le Atua o le Alofa (Kenese 2: 1 - 17).**

**A'E LE KOLISI**  
**FAAFAIFE'AU MALUA**

O le itula e 7.00 i le afiafi o le Aso Lulu, 7 Fepuari na faia ai le Sauniga Lotu ma le Sakarameta o le Faamanatuga, i le Malumalu o le Iupeli e aloa'ia ai le amataina o galuega a le Kolisi Faafaifeau i Malua mo lenei tausaga. O le afioga i le Taitaifono o le Komiti o Malua ma le Komiti Au Toeaina, susuga Asotasi Gu Time FT (Toeaina Faatonu Apia Sasa'e) na ta'ita'i le sauniga, o le Tusi Paia na faitauina e Pouniu Faamausili FT (Aukilani), o tatalo na ta'ita'iina e Tauaaga Mataafa FT (Kuiniselani Saute) a o le lauga na saunia e Leaso Tupa'i FT (Faasaleleaga). Na auai ma molimauina e le Laulau Fono Tele, Komiti a le Au Toeaina, susuga Faafeagaiga ma Faletua, le Faifeau Pule Kolisi Faafaifeau Malua, susuga Dr. Vaitusi Nofoaiga FS, faiaoga ma faletua, o matua ma aiga o A'oa'o ma Faletua e le gata i le vasega faato'a a'e, a e faapea foi i le lautele o le Laumua. O pese o le sauniga ma viiga o le Atua na lagiina lava e le Kolisi Faafaifeau Malua.

O le sauniga foi lea na faafeiloa'i aloaia ai nisi Faia'oga e toatolu ma latou Faletua o le a amata le galuega faafaia'oga i lenei tausaga - Susuga Reupena Maulolo FS, Tafatolu Tapaleao FS, ma Faafetai Korina FS. O i latou uma e maua faailoga o le Foma'i (PhD, le Matuaofaiva o Faatufugaga FaaTusi Paia. Malo le taupati, malo le sailimalo! Na taualuga le sauniga i le Talisuaga Paia a lo tatou Alii, na ta'ita'iina lava e le susuga Taitaifono Komiti Malua, a e tautu ai le mamalu o susuga Faiaoga o le Kolisi.

Na valaaulia e le Susuga i le Faifeau Pule ia Vaitusi ma le Laumua, le mamalu o le Au Toeaina ma le faapotopotoga ina ia afe ane i le Senetenari, mo se vaimalu ma le taumafataga. Sa faapea foi ona faaleoina ai le agaga faafetai o susuga i Faia'oga ua amata nei, ma latou fa'aaloalo ai i le Komiti Au Toeaina ma le aufaigaluega, e pei ona fai ai le susuga Reupena Maulolo ma latou fofoga taumomoli. Na tali fuitau, faafetai ma faamanuia le Failautusi Au Toeaina, susuga Amuia Seuala FT (Itu o Tane), e tusa ma le fa'aaloalo i lea po. Na ta'ua faapitoa foi le agaga faamafanafana o Tama, i le susuga Malutafa Faalili FS ona o le maliu o lona faletua o Josephine, aso 11/1/2024.

---

# **LAUGA SAUNIGA A'E** **KOLISI MALUA 2024**

**(saunia susuga Leaso Tupa'i FT)**

Tusi Faitau: Mataio 11: 25 - 30

Matua: f.29a, 30, *“Ia outou amoina la'u amo, ma ia outou fa'aa'oa'o mai ia te a'u. Auā e 'ave gofie la'u amo, o la'u avega foi e māmā ia.”*

Manatu Autu: **OLA FAASO'O**  
**FAASAMASAMANOAPOOLEA'OA'OINA**  
**MAIFAATINOGA?** (Tusi Faitau Aso, 7/2/'24)

Ina ua i'u la'u a'oga mai le Kolisi, o le tala muamua lava lea a lo'u tina na fai mai ia te a'u, 'Sauni e atoa loa lou 21, ona e su'e loa lea mo Malua.' O se tala e fai mai ia te a'u, e leai lava ma so'u ano atu i ai pe ou te fesili foi po o le a le mafuaaga o lona mana'o e pei ona aumai ia te a'u. O le tausaga tonu lava e atoa ai lo'u 21 tausaga, a e toe fai mai foi lana tala lava lea e tasi. 'Sauni o le a 'ave lou igoa e te su'e mo Malua,' a o le taimi foi lena ua amata ona suamalie le ola faigaluega. E fai mai lava a e faasamasamanoa lava lo'u mafaufau i lana molimana'o.

Peitai o le tausaga tonu lava lena na maliu ai lo'u tina, a o loma le masina e atoa ai lo'u 21. O iina na faato'a amata ai ona a'oa'o mai i lo'u mafaufau o le manaoga o lo'u tina ia te au, ua pei o se aitalafu ua le'i totogiina, auā o lea ua malaga ese atu, a e le'i i ai lava sa'u tali i ai pe ua ou talia pe leai. Ona sa faasamasamanoa i le mafaufau lona fai mai, a e sa ou gūgū e leai se upu. Lea ua a'oa'oina mai a'u ina ua ia maliu, ua tasi le mafaufau, o le sauni loa e su'e.

Ou te le'i toe faatali, a o le tausaga lava lena e 1979 na ave ai lo'u igoa mo le su'ega i le 1980; na manuia le su'ega ma ou ulufale ai i Malua i le tausaga 1981. O la'u foi sau i le Kolisi nei, sa ou sau ma le mafaufau, o le a'oga i Malua e leai ni feau e faia ai, a e pei o iunivesite i fafo, na o le a'oga lava ma to'aga e fai meaaoga. E ui lava ina aumai le lisi o mea e a'e mai ma le tagata e aofia ai le sapelu, le 'oso ma le tolopā, a e ta te le'i manatu mamafa i ai, ona sa faasamasamanoa le mafaufau o Malua e leai ni galuega e faia ai.

Na faato'a ou iloa le sesē o le mafaufau sa i ai ina ua uma le fa'aa'e o le a'oga i le aso muamua, a e sau le faatonuga a le Peresetene, o le 5.30 i le vaveao o le aso e sosoo ai, le tauvalaauga i le fale mafutaga, a ia usu atu le tagata ma lana sapelu. O le vaiaso u'amea muamua, e uma ane ua fafa le isi pa o le lima i luga o le isi pa, a e ua amata foi ona lelei uma lima e lua i le sasaga o le vao. Auā o aso ia sa le'i i ai ni moavao, a e na sasa atoa le malae, e ta le 'apa a e sasa faataamilo le sasaga o le mutia. Na o sina taimi e mālōlō ane ai, ona toe sosoo lea o le isi galuega i le aoauli. Ua sa'o ai le ta'u o le vaiaso lea, o le vaiaso u'amea.

Ua tofi a'u ou te kuka tumau, ua manuia le ma'i tina o le faletua o le faiaoga, sau le faatonuga ou te alu e toli mai ni niu e fai ai se vaisalo e faatali ai le te'a mai i tua o le lagi failele o le faletua. O a'u ou te sau i Malua ou te le iloa a'e i se niu aemaise o le faaogaina ai o se aufaga. Ou alu i le isi a'oa'o Toelau e tausaga tolu, faanoi mai lana laupapa e masani ona ou vaai latou te fa'aaoga, e fe'a'ei ona sai lea i le tino o le niu, a e tu lelei ai ma toli niu. O le niu aupito maulalo sa ou a'e ai, a e manatua ou te a'e aunoa se aufaga. Ua uma ona sai le laupapa i le tino o le niu, ou te oso atu i luga e tu ai, ua maualuga tele e le mafai ona ou tu sa'o i luga. Ua matua tiga ou tulivae ona o le a'e leai se aufaga, a e toe oso atu i luga faapea o le a mapu ou tuli mai le aega, e leai o la e lava e faatu. Na o le pau le mea na ou onosai ai, ia maua ni niu mo le vaisalo. Na ona uma lava ou sosolo mai i lalo; e oo mai i lalo ua ma'osi'osia uma le fatafata a e ua tia'i ai i luga o le niu le laupapa a le a'oa'o na ou alu ma a'u. Sa ou faamalie i le A'oa'o Toelau e alu e toe aumai lana laupapa, ua leai so'u malosi e toe alu ai i luga e tatala le maea na saisai ai.

E ui ina faigata o ia mea sa fetai ai i le amataga o le ola aotauina mo le tala lelei a lo tatou Alii, a e sa lei matua lagona se faavaivai, aua ua le toe faasamasamanoa le mafaufau, a ua talitonu o mea uma nei ua faatino, o loo a'oa'o mai ia te a'u aua o lou valaauina lea mai le Atua, e fai ma faifeau, pei ona manao ai lou tina.

---

O ma'ua foi ma lo'u toalua e le gata ina talavou faatoa tai 26 tausaga, a e o atu i le galuega e matua ese lava le olaga ma mea e faataua i le soifuaga o lea nuu, mai le mea sa ola a'e ai i le taulaga i Apia. E alu atu i inei sa masani ai i le eletise, a e alu atu feto'ai ma le pamu o le moli penisini ma le tau pulapula o le mōlī matagi e taulaga ai le tina ma le fanau i le po. Sa lagona pea lava le mafanafana ma le mautinoa, o fita nei o le galuega, o mea ua uma ona aotauina ai le faigaluega i totonu o le Laumua nei.

Sa iloa ai le aogā o mea sa aotauina ai i le Kolisi auā le feagai ai ma le galuega tausi nuu i tua. E ui i le mamafa ma le faigata, a e māmā pe a fai ma le loto talitonu o lou valaauina lea mai le Alii. O lou ulufale mai i le Kolisi o Malua, o lou usitaia lava lea o Lana valaau ia te oe e fai mona soo. E le o se soo la ia ola faasamasamanoa, a o le soo e anagatā ua a'oa'oina mai faatinoga o loo fai i totonu o le Kolisi.

Fai mai le matua, *“Ia outou amoina la'u amo, ma ia outou faaa'oa'o ia te au...Aua e avegofie la'u amo, o la'u avega foi e māmā ia.”* O le amo, o le laau lea e faae'e i luga o ua o ni meaola mo le faafaigofieina o le tosoina o se avega mamafa. A fa'aaoga foi e le tagata, pei ona tatou iloa, o lona aoga lava lea e tasi, ia māmā ma faigofie ai ona ave se avega mamafa. O le fa'aaogaina e Iesu i inei, o loo Ia aumaia ai se gagana faatusa (metaphor) e faasino i le taua o le a'oa'oina lelei o ona soo. O lona uiga o le amo, o le amo a Iesu, ua a'oa'o mai mo e fia fai mona soo, pei ona Ia fai mai, *“Ia outou fa'aa'oa'o mai ia te a'u.”*

Afai tatou te vaai i le fetalaiga a Iesu i le fuaiupu 27, o loo faapea mai, *“Ua tuuina mai mea uma ia te a'u e lo'u Tama; e leai foi se tasi ua iloa le Atalii, na o le Tama; e leai foi se tasi ua iloa le Tama, ua na o le Atalii, ma se ua loto i ai le Atalii e fa'aali atu i ai.”* O lona uiga o le faaupuga lea, *Ia outou fa'aa'oa'o mai ia te a'u*, o loo faatatau lea i lo tatou a'oa'oina o a'oa'oga ua Ia fa'aali mai. O a la nei a'oa'oga ua fa'aali mai e Iesu, tatou te a'oa'oina? O le tali, e tele anoanoa'i a'oa'oga, e pei ona molimau le Tala Lelei.

A ua ou aumaia nisi nei a'oa'oga, e fai ma lu'itau ma faamanatu mo lenei sauniga ma le aga atu o le tatou Kolisi Faafaifeau mo le amatalia o ana galuega faalea'oa'oga o lenei tausaga 2024:

**(i) O le ola usiusita'i.** E pei ona saunoa ai lo tatou Alii i lana tatalo i le mauga o Ketesemane, *“Lo'u Tama e, a e finagalo i ai, ia e aveese lenei ipu ia te a'u; a e 'aua le faia lo'u loto, a o lou finagalo.”* Lk 22:42. Ua manatua ai la'u faiaoga lea na ou kuka tumau ai. Ou te sau i le isi aso e fesili mo se galuega e fia fai, ona fai mai lea o le faatonuga a le faia'oga, 'Alu e totō ni ta fa'i se tolu, ona e alu lea i le tou fale.' O le taimi tonu lena i tua tonu o le fale o le susuga ia Samasoni, sa vaoa ma nai fa'i sa tu solo ai ma nai tama'i taamu a e sosolo ai le maukeni. Na ou alu atu loa, ua lē na o le tolu, a e ua fai lelei le laina fa'i e sefulu.

O le aso na soso'o ai na toe fesili mai le faia'oga i le galuega sa faatonu mai ananafi? Na ou tali atu i ai, e sefulu fa'i ua uma ona totō. E fia fa'i na ou fai atu e totō? Lau susuga, e tolu. Ona fai mai lea o le faiaoga, ia ou alu e toe tase'i ese le tele o fa'i, a e tuu ai na o le tolu, faaopoopo i ai ma ni taamu e tolu. Sa ou faapea, e ese foi uiga o lenei faiaoga! A e ou toe mafaufau ifo, o se a'oa'oga taua lenei mo a'u, e ui ina ua maumau ai nisi tama'i fa'i, atoa ma lo'u tigaina, a ua a'oa'o mai ia te a'u lea mea, ina ia tuu lo'u loto, a e usitaia ma fai le faatonuga e fai mai ai le susuga i le faia'oga.

O le uiga foi lea o le saunoaga a le Alii i le f25, *“Ou te faafetai ia te oe, lo'u Tama e, le Alii o le lagi ma le lalolagi, ina ua e nanā ia mea i e popoto ma atamamai, a ua faaalua atu ia mea i tama valevale.”* O e popoto, ua faatatau lea i tagata ua manatu ua i ai le atoatoa ma le iloa, latou te le toe manaomia ai a'oa'oga e tuuina mai e le Alii. O i latou ia, e le faapea ua natia mai ai e le Atua le 'oa ma le tamaoiga o le olaga faasoo, a ua latou faia lava lo latou faamasinoga. E ese mai ai tagata ua faatusaina i tama valevale, o tagata ia e lagona le faatauvaa ma leai se iloa, e talia gofie le ola a'oa'oina mai e le Alii.

O lona lua o fa'aa'oa'o ua faailoa mai e le Alii:



---

**(ii) O ala o le agamalū ma le loto maulalo.**

O le faamalosi'au lea a le Alii mo ona soo. O le faatinoga o le ola auauna, e lagona ai le feagai ma tiga ma mafatiaga. A ua fetalai lo tatou Alii, *“Ia outou o mai ia te a’u, o outou uma o e tigaina ma mafatia i avega, o a’u foi e malolo ai outou.”* E fesootai le fetalai lenei a lo tatou Alii ma le vaega mulimuli o le matua o loo faapea mai, *“O la’u avega foi e māmā ia.”*

O loo ta’ua e Ieremia 6:16, le valaauina o Isaraelu e tutu i ala, ma fesili i ala o le vavau, po o fea le ala e lelei ma ia savavali ai, ona maua lea e i latou o le malologa mo latou agaga. Lea ua toe fa’aaogaina e le Alii, ma fetalai tuu sa’o e faasino ia te Ia (o A’u nei) o le Ala, mo ona soo e mulimuli ma fa’aa’oa’o i ai, ona maua lea o le malologa moni. O ona ala, o ala o le agamalu ma le loto maulalo. O le ala lelei lea ua faasino mai e ala o le vavau, e maua ai le malologa o agaga mo e ua mafatia ma tigaina i soo se avega.

I le Evagelia a Mataio, o loo ia faamamafaina mai ai le tāua o le agamalu ma le loto maulalo. E pei ona i ai le mataupu 18:1 - 10. Ina ua fesili atu ia Iesu ona soo, po o ai e sili i le malo o le lagi, ona faatu lea e Iesu le tamaitiiti i o latou luma, ma faasino ia i latou le faatusa o le tagata e sao i le malo o le lagi - ia pei o se tamaitiiti, o lē faamaulalo o ia ia te ia pei o le tamaitiiti, o ia lea e sili i le malo o le lagi.

O outou a’oa’o, tou te o mai i totonu o le Kolisi nei, e eseese uma lava outou fausaga sa fafau mai ai outou i aiga, nuu ma aulotu. E lē tutusa foi mafaufauga ma le iloa o loo sau ma le tagata lava ia. A e pau lava o lea, o le mea taua ua faamanatu mai i a’oa’oga a lo tatou Alii i lenei aso, o ala ua a’oa’o mai e Iesu mo ona soo ia fa’aa’oa’o i ai, o le loto maulalo ma le agamalu. O iina tatou te malolo ai mai le tigaina ma le mafatia i avega o loo tatou tauaveina, a e faapea foi ona malolo ai ma outou agaga.

**(iii) O le a’oa’oga o le ALOFA.**

O le a’oa’oga mulimuli lea ua a’oa’o mai Iesu ina ia tatou a’oa’oina i a tatou faatinoga. Fai mai le vaega mulimuli o le matua, *“Aua e ave gofie la’u amo, o la’u avega foi e māmā ia.”* E ave gofie le amo a Iesu, pe afai tatou te amoina i le alofa. E leai se mea e mamafatu, pe afai o loo fatino i le alofa. O le a le faigata o se galuega ma le tiga o se avega, a e māmā uma lava aua ua faia i le alofa le faatinoga.

A’oa’o, e le faigofie le tapuaiga a outou matua ma aiga, o aulotu ma Ekalesia i faifeau ma faletua, outou matua faaleagaga. O le mea muamua lena ia gotouga ifo i o outou loto, ina ia outou ‘alo’alo ese ai mai le ola faaso’o faasamasamanoa, a ia a’oa’oina outou i faatinoga o le alofa. Ia outou alolofa i le tapuaiga o loo tu’i mai le mulipapaga, o loo talosia ma lagolagoina mai outou. Ia faapea foi ona outou alolofa o outou ia te outou lava. E faapena foi i a outou susuga i faiaoga. Aemaise lava i latou ua faato’ā amata i le tausaga nei le galuega faafaia’oga i le tatou Kolisi Faafaiifeau. Ia outou faatino o outou valaauina i le alofa ma le faamaoni i le Ekalesia, ona a’oa’oina mai ai lea o outou i le alofa o lo tatou Alii.

E manatua ai le tala i le auso loomatutua o Tutuila uma, a ua nofotane le isi i Upolu. Ua oo i le isi aso ua sau le malaga mai Tutuila, e fai le faatua i le faaulufalega o le falesa o le nuu o nofotane ai le uso. O aso o le leaga o auala e le’i faataina, tau leai foi ni pasi ma taavale. O tua o le loli na nofo ai le loomatua; na o le saalutu solo, e le mau lelei le nofo. Tete’i le aumalaga i le faapea ane o le loomatua, ‘E! pe aisea ea na fai ai e le Atua lenei mea o le alofa! O lenei e oo atu i Saleaumua ua masofasofa uma tagata i le leaga o auala, a e faigata le alofa i lenei teine ma lana fanau.’

O le afio mai o Iesu ma Lona faatinoga o le Alofa, sa le’i faafiti i tiga o le satauro, a e sa Ia amoina ma maliu ai. O tatou vagavagaia le La’o’ai o le Faamanatuga, o le tino o Lona alofa, ua tatou maua ai le malologa e faavavau. Amene.

**Saunia: Susuga Leaso Tupa’i FT**  
**Toeaina Faatonu Matagaluega Faasaleleaga.**

---

# ***O LE PEROFETA MULIMULI***

***(O se tala faafagogo ua faaSamoaina mai le tusi, 'The Last Oracle' tusia e James Rollins)***

Na fai atu Rosauro, “Na te iloa se auala e lūlū ese ai lo tatou si’usi’u.”

Na taia lalo o le mati’e i le pisi a’e o le vai, ona mimilo tu lea e Karai i le taumatau ma mulimuli atu i le alia o lopala.

“Agavale pe a te’a mai le isi pa!” na valaau atu ai Api.

O le a le pa?

Na faalagolago atu Karai i luma. Na matuā pogisā aunoa ma molī o le taavale. Maimau pe ana malamalama...

Na pasi ane se elikopa, o ona molī sulu na matua’i malamalama. E lē o se mea sa faamoemoe Karai e tupu. Ui i lea, i le segaia mai ai o ona moli, na ia iloa atu ai se pa maa i luma. Ae paga lea, na iloa atu foi i latou e moli sulu. Na suluia atoa le taavale i le malamalama.

Na toulu ifo le timu o pulufana, salalau solo i le vai ma le lopala. A e na i’u lava ina vivili pa’u, ma latou sosola ese ai mai le vai aga’i i luga o se mati’e.

Na taamilo mamao solo le elikopa. A o lona moli sulu sa tulimata’i malie pea i latou, ma tuliloa le mea sa agai i ai.

Na a’e le taavale i le isi mati’e, lelea i luga mo sina taimi toe palasi patatūifo i lalo, na taia ai le nofoaga o Karai. Na lagona le auē mai tua o le taavale.

I lalo o le a’ega i le itu taumatau, na iloa atu ai se sami uliuli na vaelua ai le laufanua i luma atu. E lē o se suavai, a o se vaomatua telē na’uā.

“O se toga mago!” na fai atu ai Api. “O se faatoaga ua leva. O ni laau ua matutua. Na galulue ai lo’u aiga i auga tupulaga e tele ua mavae.”

Na fana sa’o atu Karai i le togālaau pogisa.

Na mulimuli atu ai ma molī. Ma le timu o pulufana, peitai na fepe’opi’ia’i solo ai Karai sa le’i mautonu se auala e tasi. Sa leai se pulufana e pa’ia i latou.

I se toe gogolo o le afi o le taavale, na latou mauulu atu ai loa i totonu o le togalaau. Na mou malie ese atu le patapatatū o elikopa. Na alu atu atili i totonu Karai, pei se pagotā o loo sola i totonu o se togāsaga pogisa.

“O le a le telē o lenei toagalaau?” na ia fesili ai, a o tau fuafua le saogalemu o lo latou lalafi ai i totonu.

“E sili atu ma le sefulu eka.”

O se faatoaga tele.

Ina ua te’a ese lo latou lamatia, na toe faamautū lelei loa o latou nofoaga.

Na faalagolago atu Rosauro. “E i ai le isi mafuaaga na naunau ai Api e sau.”

“O le a lena?”

Na ia tuu a’e i luga se tupe siliva ia iloa atu. O le tupe Eleni faatasi ma le uili sakara i lona itu. Na ia faasino i le malumalu.

“Na te silafia le mea o loo i ai.”

Na vaai atu Karai i le faata i tua. Na ia iloa atu Api o loo nofo i tala ane o Luka. E ui ina pogisa, a e na ia iloa atu foliga o le fefe i le tamaloa. Na ia manatua le faamatalaga a le tamaloa Initu faasino i le nofoaga na aga’i i ai Atipale Poleki ina ua nimo atu o ia.

O se nofoaga ua faamalaiaina.

6 Setema, 10.26 afiafi

Atumauga o Urale i Saute.

O Monike sa tiute e leoleo.

Na ia faataamilo solo i le faleoo i ona ofu ua mamago ma ona ponaivi ua mafanafana mai le tainafi. Na ia faamimigi faataamilo solo ma le filemu e gata ai, a o ia laalaa ma le faaeteete. Na sulu ona seevae pa’u, a o ona manoa sa le’i noanoaina. Na ia fai i tamaiti e faamaulu o latou seevae a e le’i faapouluulu i o latou pito. Pe afai e fia tuumuli ese faanatinati, na te le’i mana’omia lo latou autago solo i o latou lavalava.

Na faapupuu faatasi Konesetatina ma Kisika, o le tagata i lana palanikete. E foliga itiiti mai pe a momoe, aemaise lava Konesetatina. O lona mataalia ma le faatagata matua o ana tala e foliga mai ai o ia se tagata matua. A e ina ua to’amalie lona tino, na maitauina e Monike mata e le’i sili atu lona matua i le sefulu ma le lua.

Na laa pasi atu Monike ia i la’ua, ona atili lea ona faaeteete. O le taimi nei ua na iloa vaega o le fola e o’i’o’i malosi ma na taumafai e ‘alo ese ai. Na taatia faagaulua Piota i lima o le manukī loomatua. Na nofo o ia i luga o le fola, tautau ifo lona ulu i lona fatafata, manavanava loloa a o moe. O Piota na vevesi muamua, i lona popole i lona tuafafine masaga. Na talitonu Monike i lagona



---

osofia o le tama, peitai sa leai se mea latou te mafai. Na alu le itula atoa o taumafai e faatoafilemu Piota se'ia oo ina filemu, a o le savaliga o le aso na matuā faavaivaia ai le tama toe o se pito filo. Na i'u lava ina pa'u ifo ua vaivai ma moe ai, a o leoleo ai Marata.

O le a lava le taumafai o Monike e savali lemu, a e sa ia sii a'e lona ulu ma faasaga atu ia te ia a o laa ane. O mata vaivai i le fia moe na pupula ane, ona toe pa'u ifo lea o laumata ma punou faatasi ma le ulu.

Vaavaai lelei pea o ia, Marata.

O le mea sili o i ai se isi o loo alofa i nei tamaiti. Na toe foi atu Monike i lona nofoaga i autafa o le faitotoa. Ua na faatū i luga le laulau i lona itu, i le va o potu ma tuu ai se nofoa iina. Na ia goto ifo i ai ma le mapuea.

Na ia faalogologo atu i leo eseese o le po: o le gogolo o vai, tagi mai o lane ma alisi, ma le lulu mai lea taimi i lea taimi. Na faate'ia o ia talu ai i se tino lapo'a na ui ane i autafa o le faleoo, a e na ia autilo atu i le va o faamalama ma iloa se pua'a aivao palapala o suasua solo.

Na tuu pea e Monike le manu e taa, pei o se leoleo fai nifo aivao. A e na i'u lava ina alu ese.

O pā'ō o le vaivai na faafilemuina o ia. E le'i leva a e pa'ū ifo lona foi ulu i luga o lona fatafata. Faato'a moeiini ifo lava ona mata.

Ua e toe tuai foi, Monike! Gaioi!

Na toe faasa'o a'e i luga lona ulu, ma taia i le pito o le laulau. Na lagona le tiga i lona ulu – e le mai le taia i le laupapa, a e mai se mea loloto ifo i lalo. Mo sina sekone na ia tofo...tofo i kinamoni, ua palu ma mafanafana, faatasi ma se musumusu atu o ololo i ona laugutu. Na faatumulia o ia i se nanamu, ma na ia sa'euina o ia.

Na toe mou malie atu.

Ua na o se miti...

Peitai sa iloa lelei e Monike. Na ia nofo sa'o i luga a o gagalo ese atu le tiga. Na ia tagotago atu i filo sa i tua o ona taliga.

O ai a'u?

Sa faamatala e Konesetatio se vaa meli na goto, o se upega mamafa, ma lona lavea'iina i le vasa. Pe sa ia faigaluega i luga o le vaa? Pe o ia o se pasese a le vaa? Sa leai se tali i totonu o ia, na o le pogisa.

Na pulato'a atu Monike i le potu ma na maua ai ni mata o pupula mai ia te ia. Sa le'i minoi Piota.

Na ona ia faataupupula ia Monike. Pe o le taia o lona ulu i le laulau sa te'i ai ma ala le tama.

Po o se isi mea.

Na fetau le vaai atu a Monike ma le faatau sisila mai a le tama. Na ia faitauina se vaieli o nutimomoia i mata o le tamaitiiti, e loloto tele mo se tagata ua laitiiti. Na oso ai le fefe o Monike. E lē o se fefe pe mafatiaga itiiti. Na suluia le leai o se faamoemoe i ona foliga pepe, o se atuatuvalega sa le tatau ona i ai i foliga o soo se tamaitiiti. Na maalili le tama, minoi ai Marata.

Na tagi malie Marata ma vaai atu ia Monike.

Na tu Monike ma savali atu ia te i laua. Na susulu manaia foliga o le tama i le pupula o le afi. Susulu malosi tele. Na siaki e Monike lona muaulu.

Sa vevela. E fiva.

Na pau lea o le mea le manaomia o se tamitiiti e ma'i.

E le mafai na ia maua sina mapu itiiti?

O lana fesili na tali i se 'e'e malosi. E latalata mai. Na amata i le na o se gugulu o le fa'a'i, a e faasolo ma i'u ina 'e'e atoa. Na faamanatu ai ia Monike se tagata e lia'i le manoa o se 'ili afi.

O se isi valaau lona lua na tali mai i le isi itu fesaga'i.

O nei tagi faataiō a manu na faate'ia ma laga ai i luga Konesetatio ma Kisika i o la'ua vae.

Sa leai se lapata'iga.

Sa le'i iloa e Monike ni faailoilo ua lata mai le taika. E oo i le tama sa na le'i iloa. Atonu o le fiva po o lona vaivai tele. Sa faamoemoe Monike mo sina fa'aaliga.

Sa le'i malu puipuia le faleoo. Mai le vaaiga na ia iloa talu ai i luga o auvai, o le mamafa o le taika e tasi e tusa ma le fitu selau pauna, e tele i maso ua malolosi. E mafai e taika ona osofai ma talepe i lalo faitotoa po o le taualuga i nai sekone. A o le taimi nei, ua na ona la faataamilo i le fale, ma gu, ma iloilo.

Na fa'aalia e Konesetatio se isi popolega. E tusa pe lē osofai e taika le fale, a e mautinoa o loo mulimuli mai tagata tutuli vae lua. E le tatau ona maileia i latou e taika iinei.

Sa leai se filifiliga, na o le gaioi faanatinati loa. Na se'i ane i fafo e Monike le tamai naifi na maua i le fale mai lona fusipa'u ma na utia le 'au o le naifi i le va o ona nifo – ona ia kolosi atu lea i le ta'inafi ma se'i mai se fafie o mumū. Talu ai, na ia fisifisia faama'ai ai se lālā laau e tolu futu le

---

umi mai le paina i fafo. Na malosi le resini faigofie na ‘apo e le afi, ma aveva ai le laau pei o se sulu mumū.

Na faatopetope solo Monike i totonu o le fale. Na ia tutu atu le sulu i lalo o lau o le taualuga. Ua leva ona taatia, ma ua mago pa’a’ā. Ua uma foi ona ia sasa’a le karasini mai le moli fagu i ni taiga ‘ie’ie ma tuu atu i le taualuga o le fale.

Na vave le sosolo o le afi.

O taika na ōu leotele atili, taalili i le taaligoligoa o le po.

O tua atu o Monike, na sii a’e ai e Konesetatino ni laupapa paina mai le fola. O Monike ua uma ona ia tase’i ese fao i le naifi ma ua matagataga ai laupapa. O le fale sa siitia teisi i luga, na faatu i ni tulaga pou, ma avanoa ai se auala e fetolofi ai na matala i ona itu uma e lua. Sa maualalo tele mo Monike, ae sa fetau mo tamaiti ma Marata. Na ia tatalo ia ‘aua nei o ane i ai taika.

O le faafesagai ai ma le faitotoa, na faamatala ai e Kisika faamalama o le potu. O le taimi lava foi lea na kiki ese ai e Monike le laulau mai le faitotoa.

Ua leai se taimi, a e ua sauni foi, ona ia tālo atu lea i tamaiti o i lalo a o faatumulia le pito i luga o le fale i le asu ma le vevela o le afi.

Na fesoasoani Marata ia Piota i lalo o le fola. Na sosoo atu ai Kisika. Mulimuli atu Konesetatino. Na lue atu le ulu o le tama matua ia Monike, ua le o se tamaitiiti, a ua toe tagata matua. “Faaeteete,” na lapatai atu ai Konesetatino. Na lue atu le ulu o Monike, a o utia le naifi i ona nifo. Na faapa’u ifo Konesetatino ma mou ese.

Na taumafai Monike e tata’i ese le vaai a taika. O le mu ai o le taualuga ma tele o le asu e ono faanunumi ai i la’ua. E tatau ona ia faaopopo i ai. Ma le sulu i ona lima, na ia faitau ai le tasi e oo i le sefulu – ona kiki tatala lea o le faitoto’a ma lona malosi atoa. Na nuti laupapa ma malepe i lalo le faitoto’a.

E tolu mita na punou mai ai le taika. Na te’i o ia, ona mimilo mamao lea i le faalii. O se tasi o ona lima na ia save’u atu ai le ‘ea i ona luma.

O se tāga a le manu pei o loo fai mai, faatali oe. Na ofo Monike mo sina taimi i lona lapo’a. Sefulu ma le tolu futu le umi. O ona mata na iila i le susulu atu i ai o le afi o le mu o le taualuga o le fale. Na faagalugaluga i tua ona laugutu, iloa atu ai lona laulaufaiva piniki o loo faapi’o mai totonu o se pa o tainifo uumi ma ma’ama’ai.

Na faatāupe atu e Monike le sulu o se li’o o mumū. Na toe tā tā lona fatu i tua i le amataga o le soifuaga o le tagata a o ola lafilafi i totonu o ana.

Ui i lea, e pei ona sa ia faamoemoe i ai, o le taia leo tele o le faitotoa na tosina ane ai le taika lona lua. Na oso taamilo saesae mai le tulimanu agavale, maualalo, faanenefu a o fulu tusitusi ma mai’u’u maamaai lima lapopo’a. Na togi atu e Monike le sulu i mata o le taika a o oso atu ia te ia.

Na lagona le mu o fulufulu, o le tifa o le taika ma taavale ese.

Na iloa atu e Monike le ma’ila i le taliga agavale o le taika, o ia lea e igoa ia Sakara.

O lona uso o Arakati na ou ma osofa’i mai e puipui lana paaga.

Na iloa e Monike ua sau sa’o le manu ia te ia, sulu pe leai.

Na ala ai ona meme’i i tua lona lima ma velo atu le fafie mumū pei o se tao. Na lele atu i le ‘ea ma tau tonu i le gutu faamaga o le taika. Na osotū i luga le taika, tuu feanu ma mimigi solo i luga o le ‘ea.

Na uu mai e Monike le naifi sa ū i ona nifo, osooso atu i ona tamatamaivae, ma puna atu i totonu o le faleoo. A o ia liliu ane, mai le pito o ona mata na ia iloa atu ai Sakara ua oso sa’o atu ia te ia.

Na ia manavanava i le fefe, a o ia tamo’e saosaoa atu i totonu o le fale o tumu i le asu. Sa pei o kasa faatagi mata le vevela ma le maini na faatauaso ai o ia. Na ia tamo’e e tusa ma ona lagona. O le faamalama matala sa tu faafeagai tonu ma le faitotoa. Na punitia lana vaai i le tafe o loimata, a o ia tau iloa atu se avanoa pogisa i totonu o le puipui. Na ia puna sa’o atu i ai, o ona lima na faalalava atu i ona luma.

Na sagatonu lana oso – seia ona faalogoina ni mai’u’u o sasae atu le vae o lona ofu. Na masae ese le ie, a o lona tino na lelea. Na taia lona tau’au i le pito o le faamalama ma na lagonaina le gase o lona lima ina ua lavea. O le malosi o lana oso na ia lelea atu ai i fafo. Na mamafa lana pa’ū ma tau matapogia ai. Na lelea ese atu le tama’i naifi i vao maualuluga.

I ona tua, na taia ai Sakara i le puipui, sa le’i sauni o ia mo le pu itiiti o le isumu na sola ese atu ai Monike. O le malosi o le taia na luluina atoa ai le faleoo; na sisiva maualuluga ai le mumū talalī o le afi. O le tagi i le ita fe’ai na tulia i luga Monike i ona vae.

---

Na ia tau pa'ū, toe faasa'o lana tu, ona momo'e saosaoa lea mai le faleo'o agai atu i le vai. O lana tau pa'ū lena na ia oo ai i le malaia.

2.20 afiafi  
Uosigitone.

“O le tulaga lena o loo i ai le teineitiiti o se ituiga o fiva,” na ta'utino atu ai Foma'i Iuri Raeva.

Sa nofo Penita fesaga'i ma le laulau 'ai, ese mai le saienitisi Rusia matua. Sa nonofo i itu e lua o Fomai Raeva, ia Ioane Mapeletope, na maitauina e Penita mai se fa'aafe na fai e Seana Makenaiti – ma se isi malo fa'aaloologia faate'ia, o Fomai Tereni Makepalaita, o le paaga sa faapea o loo leiloa a Atipale Poleki.

E foliga mai o lea ua maua o ia.

E i ai ni fesili e faitau afe a Penita mo le tamaloa, a e peitai o le fono iinei i le Laumua Girile i Peniseliveina na mamalu lava fesoota'iga fufusi i luga o alaleo faavaega'au. O le tapulaa ma le aotelega o la'ua talanoaga na auli ese. O se talanoaga faasino ia Fomai Poleki na aveese ma le laulau. Mo le taimi nei. Na pau le mataupu o loo tatala mo talanoaga o le soifua maloloina o le teine.

Ona o lea, na aumai ai e Penita ana lava tagata popoto faapitua i le laulau lapotopoto. O lana itu o le laulau na nonofo ai Lisa ma Malekoma. O le toalua lena sa i ai le silafia ma le atamai faafomai i tua atu, e fua i ai le talafeagai o faamatalaga e ofoina atu.

I le isi itu o le laulau, sa lē nofo lelei mai ai le Rusia. E lē o le manu sau'ai lea na vaaia faalemafaufau e Penita ina o ia faia fesootaiga mo le talanoaga lena. E foliga mai o se tamā matua agalelei i lona suti uliuli, a e sa i ai se vaaiga taufaafefe i ona mata. Na faitauina foi e Penita lona faanunumi a o ia talanoa faasino i le teineitiiti. O laina o ona foliga na oomo ma laulalā ina ua ia vaai i faila na faasee atu e Lisa i luga o le laulau. Na masalosalo Penita na o le pau lava le mafuaaga o le lagolago atu a le tamaloa, o lona popolega ma le fefe i le ola o le teineitiiti.

“O le tulaga faasolosolo leaga o le teine e mafua mai i tui ma fualaa faaopopo,” na fa'auau ai Iuri. “Matou te le malamalama pe aisea. O maikoletoroni o le masini e i ai kaponi pelatinumi. Matou te talitonu o le fa'aaoga soo e le tagata tofia o ana taleni, o le vave foi lena ona

faaleagaina. Na tusitusi e Sasa ni ata a o i ai o ia i le tou vaaiga?”

Na manatua e Penita ana ata uma na valivali: o le fale saogalemua, o le Tai Mahali, o se ata o Monike. Na ia lue lemu atu. “O le a tonu lava lana mea o fai pe a vali ana ata?”

Na sii atu le lima o Mapeletope. Sa i ai se faasua'u i lona leo, fetau lelei e faasee ese mai ai le mea moni. “E te silafia lelei o le mea lena e i fafo atu o le talanoaga iinei. O lena ua e soli luga o le aisa manifinifi, Faatonu Koloue.”

Na tautala atu pea Iuri e ui i le faasalavei a Mapeletope, o se mea na mataitu e Penita. “O le teine o se savana mata'utia,” na ia fai atu ai, sa le'i amanaia le faatau pupula mai o itu e lua. “O ana taleni masani faalenatura e fefiloi ma isi mea malolosi o i ai taleni atisi, ma afai e tui i ai vailaau, o le a oo atu...”

“Ua lava lena,” na ou atu ai Mapeletope. “Po o le faauma loa o mataupu iinei a e matou savavali ese. E mafai ona outou avatu le tino o le teine ia i matou pe a oti o ia.”

Na pogisa foliga o Iuri, a e sa ia gūgū.

Na toe faamalosi atu Lisa ia te ia i le mataupu. “Aisea e fa'ateleina ai le leaga o Sasa pe a fa'aaoga ona agavaa?”

Na fai atu lemu Iuri, ma se namu faasala. “Pe afai e faaosofia, o fesootaiga i le va o vaega okeni ma itu lē okeni o le a amata ona liki.”

Na minoinoi Malekoma. “O le a le uiga o lau tala e 'liki'?”

“O a matou tagata su'esu'e e talitonu o momoimea e vavae ese mai i'u o le maikoletoroni ma latou faaleagaina le sua i le tua o le tagata.”

Na feliiua'i Lisa. “Leitioa a foi mai a matou sailiga e gaogaio'i. O le menigi sa le'i siamā pe i ai se vairasi, a o le faaleagaina o momoimea ese.”

Na lue atu Iuri. “Ma ina ia togafitia o ia, e tatau ona tatou faaleleia lena faaleagaina?” na ia fesili atu ai.

“Ioe. E tele tausaga ua alu i le taumafaiga o se auala e maua ai vailaau e puipuia ai le teine. I le ogatotonu, ua matou fa'aaoga se suiga toe iloilo o le fualaa e fa'aaoga e togafiti ai le kanesa o le au'ona. O le atomi e galue fai ma taofi mo momoimea taape solo ma fesoasoani e fufulu ese. O le aofai tonu o vailaau ma tui manaomia mo le togafitiga, e tatau ai ona fai se su'esu'ega ole teine ma toe su'e lona toto.” *(soso'o Sulu Mati 2024)*

---

# **NA O AFIOGA E TULEI MAI FOFOGA O LE ALII**

## **IA SAVALIA, UPU E TAUTALAGIA**

O Solomona le tagata e maoa'e le tele o ana apoapoaga ma fautuaga lelei mo le manuia o isi tagata. O lana tautalaga i lona atalii fai mai, *Faataoto 5: "1 Lo'u atalii e, ia e faalogo mai i lo'u potu; ia ua'i mai ou taliga i lo'u faautauta... 3 Auā e faasisina ifo meli ai laugutu o le fafine ese; o lona gutu foi e sili ona molemole i le suau'u; 4 a e mulimuli ane ua oona ia, e pei o le laena; e ma'ama'ai o ia, e pei o le pelu ua faatau ma'ai ona itu...8 Ia taumamao lou ala ia te ia; 'aua foi e te faalatalata i le faitoto'a o lona fale; 9 ina ne'i e avatu lou matagofie i nisi, ma ou tausaga i le ua sauā; 10 ina ne'i malilie tagata ese i au oloa; ne'i i ai foi mea na e tiga ai i le fale o le tagata ese.. 12 ma e faapea ane, Sa tele naua lo'u 'ino'ino ina a'oa'oina, ma ua tete'e atu e lo'u loto le a'oa'iga; 14 Toetoe lava, ua atoa mea leaga ua ou i ai, o i luma lava o le faapotopotoga ma le saofaiga."* E masani ona faigofie atu le fai o fautuaga lelei mo isi, nai lo le mulimuli ai. E faamaonia i le olaga o Solomona lena manatu. E tele ana apoapoaga ma fautuaga faapea mai, na o le vale ma le tagata e leai sona mafaufau e toilalo ma pa'ū atu i le agasala o le faita'aga. A e peita'i sa ia lē mafai ona tausi ma ola ai i ana lava fautuaga, aemaise o afioga paia a le Atua faasaga i tu'inauga o le mulilua ma le faitaaga, ia 'aua le faateleina "17 Aua foi ne'i faato'ateleina e ia o avā māna, ne'i liliu'eseina ai lona loto." A e faauta i le mata'utia o le toatele o avā a Solomona, o le matati'a ausia gatā e 700, ese mai le isi 300 palake. A o se a le i'uga? "3 Sa ia te ia ana avā o alo o alii e toafitu galau, ma ana palake e tolu galau; na faaliliueseina lava lona loto e ana avā. 4 Auā ua toeaina Solomona ona faaliliueseina lea o lona loto e ana avā e mulimuli i atua ese; na lē sao lona loto i le ALII lona Atua, e faapei o le loto o lona tamā o Tavita." 1 Tupu 11.

O se fesili e ono tula'i mai e faapea: Pe mata o le mafuaaga lea o le tautala malosi o Solomona i le mataupu o le faitaaga, ona o se vaivaiga tele lea sa ia tauave i lona olaga? E i ai nisi ta'ita'i latou

te faapea ona fai i nisi taimi. Latou te tautala malosi i vaivaiga o latou soifuaga, auā ua latou malamalama lelei i ai i ona tuatuaiga leaga.

O le mea ua mautinoa, pe ana muamua faatino e Solomona le olaga na ia a'oa'i ai lona atalii, e 'alo'alo ese mai le faitaaga ma tu'inaanu o le tino, semanū e ese sona talaaga tatou te maua. O le a'oa'oga mo i tatou mai lenei tupu lauiloa i le potu, a e feteenai ana apoapoaga ma ana faatinoga: '**ia savalia, upu e tautalagia**', pe faapea foi, '**ia ola, i upu e folafola**' (walk the talk).

## **O LE MATĀLALAGA**

## **O LE NUTIMOMOIA**

**"17 O taulaga i le Atua o le loto momomo... ma le nutimomoia." Sala.51.**

Pe afai e nunuti se mea anagatā ma malō pei o le ma'a ma tioata, o lona uiga e aofia ai gaioga o le tu'itu'i, e tofitofi, e tata'e, ma faamomomo, ina ia faa-nini'i pe liua ia ave ma momoimea. O le nutimomoia, o le auala lea a le Atua na te aveese ai le mitamita vale ma le faamaualuga mai ia i tatou, a ia susulu manino atu ai le soifuaga faa-Keriso. O le nutimomoia e lē faasino i le feagai ai ma faalavelave mata'utia; e toatele i latou e fetaia'i ma mafatiaga aunoa ma le faalatalata i le Atua. O le matālalaga o le nutimomoia, e lē faamamafa le tulaga ua e oo i ai, a e sili ona faatāua o lau **tali** atu i ai. O le a se a'oa'oga o finagalo ai le Atua mo oe? O le nutimomoia o le loto, ina ua aveese e le Atua mai ia te oe, le manatu faamaualuga ma lou mautinoa ua lava ma toetoe, se'ia oo i le tulaga ua leai sou malosi o toetoe, e toe faaleleia ai lou ola malepelepe. Pe afai na te punitia avanoa uma e te taumafai e sola ese ai, ma e iloa ai ua na o la le tali, ona e mauaina lea o se a'oa'oga sili o lou olaga. O le ā lea? Pe afai ua na o le Atua o i ai, ua na o le Atua foi e te manaomia!

O le upu moni, o loo faavagavaga ma faapolopolo le malosi o le Atua mo i latou, ua si'ilima latou te lē mafaia se mea na o i latou, pe taumafai e saili manuia faapito mo na o i latou lava. O le osi taulaga, o lona uiga e i ai se mea e tataua ona oti i

---

luga o le fata faitaulaga. O lea, afai e te mana'o e maua le laasaga fou o le alofa tunoa ma le paoa o le Atua i lou olaga, e tatau ona e nofo sauni e oti i ou lagona faamaualuga, faasausili, manatu faapito, ma le ola tutoatasi. Ina ia tupu a'e ma ola le laau mai le eleele, e tatau ona nuti ma tata'e le fatu laau. E tatau ona tata'e le atigi, ina ia fofoa ma fanau mai le tama'imoa fou. E faapena foi i le manu papalagi ina ia pulea lelei, usitai ma filemu, e tatau ona matua'i sasa ma gagau ma tuu i ai le faagutu. Ina ua uma le feiloaiga i luga o le ala i Tamaseko na nunuti ai le Saulo tuai, ona tatalo lea o Paulo, "6 *Le Alii e, se a le mea e te finagalo i ai ou te faia?*" Pe afai o lena o loo e i ai i le faasologa o le nutimomomoia, e tolu mea e mafai ona e faia: (i) tete'e atu (ii) tula'i ese atu (iii) tulivae ma tali atu, "Ioe, le Alii e." Pule oe i lau filifiliga, a o le fautuaga mai se tasi ua uma ona nunuti, fai le (iii) e te manuia ai.

***"17 Le Atua e, e te le inosia le loto momomo ma le nutimomoia."***

O le nutimomoia e i'u i le manuia. Ina ia maua le faaluaina mai o le agaga o Elia, na faia ai e le faifaatoaga failafumanu o Elisaia le gaioiga, e fasi ma faataape ana manu ma susunu lana suō. O le faatinoga o le alofa o Maria ia Iesu, na ia tata'e ai lana fagu u'u manogi tau tele, sasa'a ma uu ai le tino o lona Alii. Na faaitiitia 'au a Kitiona mai le 32,000 i le na o le 300, na ta'ei a latou kate, uu sulu i le lima agavale a o le pu i le lima taumatau ma tula'i atu fai ma manulaufi. O le upu moni, e tofusua i tatou ma se *vaipanoa* e nunutiina e le Atua ina ia mafai ai ona Ia fa'aaogā i tatou. O a ia *vaipanoa*? O tu ma aga masani faapaupau. O naunautaiga vaivai ma toilalo. O moomooga faalelalolagi faaletino. Mafaufauga leaga inosia. O le fefe ma le atuatuvaile e pipili ai faamoemoega. Tu'inauga lilo. Ma le anoano o le lisi o isi vaipanoa. Pe afai e te faasaga i sasa'e, e lē mafai ona e alu i sisifo, lona uiga e liliu faataamilo oe e le Atua. O nisi taimi, o le mea lena e manaomia ai le a'oa'oina pulea lelei. Ma o oe, a e lē o le Atua, e fuafuaina le *umi* o lena a'oa'oina pulea lelei ma lona *mamao*. "11 *O aoaiga uma foi a o i ai, e le manatu i ai o se*

*mea e olioli ai, a o le mea e faanoanoa ai; a e mulimuli ane e fua mai ai le fua o le amiotonu e manuia ai e ua a'oa'oina ai."* Epe.12.

Afai o oe o se matua, e te malamalama lelei i le mea lenei. O nisi fanau e faamaulalo ifo ma loimata, a o nisi e faasaga mai e lu'i ma tete'e oe. E fai e le Atua le mea e gata ai ina ia tata'e ma nunuti ou talitonuga faapea ifo ua e lava saunia! Fai mai le aposetolo ia Tesalonia, "23 *Ia atoatoa ona faapaiaina o outou e le Atua lava e ona le manuia; ia tausia lava lo outou agaga atoa uma, i le ma le loto, atoa ma le tino, ia le mata'uleagaina, i le afio mai o lo tatou Alii o Iesu Keriso."* Ia maitau mai, o lou tino o loo mulimuli lava i le faasologa o le suiga fou. Mo se agaga toefaaufouina e ola i totonu o se tino e le'i faamamāina, o le a e feagaia pea ma le 'taua faasaga i le tino.' O le a la le mea lilo e maua ai le manumalo? O le nutimomoia, ma le siilima!

***"19 ua ia tofitofi foi i areto, ma avatu i le au soo.."***

O le tele o vavega na fai e Iesu, e tatau lava ona aofia ai ma se gaioiga e atagia ai le nutimomoia; pei o le vavega na fagaina ai le motu o tagata. O le mau a Mataio 14, "19 *Ona tago lea o (Iesu) i areto e limagafua ma i'a e lua lau, ua tepa a 'e i le lagi, ua faafetai; ua ia tofitofi foi i areto, ma avatu i le au soo, ona avatu ai lea e le au soo i le motu o tagata."* Maitau mai le faasologa: na tago i ai Iesu, faafetai ma faapaia, tofitofi, ona avatu ai lea i isi tagata – le au soo ma le motu o tagata. O le faasologa lena o le auala e galue ai le Atua! Ina ia manuia ma maona isi tagata e ala ia te oe, na te muamua avatu ia te oe, ona faamanuia lea ma faapaia oe, ona tofitofi lea ma nutimomoia oe, ona faato'a tuu atu lea o oe mo le manuia o isi tagata.

O Paulo na nutimomomoina i lona mitamita faamaualuga. O lana tautinoga i le 2 Korinito 12, "7 *Ina ne'i faamaualuga a'u i le silisili ese o mea na fa'aalia mai, sa tuuina mai ia te au le mea matuitui i le tino, o le agelu a Satani, e tu'i mai ia te au, ina ne'i ou faamaualuga.* 8 *Na ou aoi faatolu atu i le Alii ona o lea mea, ina ia alu ese ia te au.* 9 *Ona faapea mai ai lea o ia ia te au, "O lo'u nei alofa tunoa e lava lea e fesoasoani ia te oe; auā o le vaivai e fa'aatoaina ai lo'u mana."*

---

O lea la, afai o i ai se amio po o se tulaga ‘matuitui’ i lou olaga, o loo finagalo le Atua e te maua lona alofa tunoa ma lona mana, i lau tauiviga e aveese. Na i’u lava ina taunuu Paulo i le nofoaga na ia faafetai ai i le Atua ona o ‘mea matuitui’. O loo ta’ua i le Eperu 13, “<sup>15</sup>taulaga o le viiga i le Atua, o le fua lea o tatou laugutu, o loo faafetai atu i lona suafa.” Pe afai e te naunau e ositaulaga ma faasatauro ina ia maua se mea, lona uiga ua e faatāuaina ma nofo sauni e totogi lona tau. E te fia savali i le mana o le Atua? Ina ia maua ana faamanuiaga? Ia, faafetai i le Atua ona o ‘mea matuitui’ ua tuu atu, ma opoopo auala o loo Ia faamomoina ma nutimomoia ai oe i le taimi nei.

## **OFUTAU MO LE TAUA**

*“<sup>11</sup>Ia oofu outou i ofutau atoatoa mai le Atua” Efeso 6.*

Mo le Kerisiano faatuatua ia Keriso, o aso uma e ola ai, o aso foi ia e feagai ai ma le taua faasaga i le lalolagi, le tino aano, le fili, le tiapolo. Ina ia fa’aauppegaina mo lenei taua, ua ta’u manino mai e Paulo, se tasi sa tau malosai ai i lenei taua, nisi nei o ofutau faaleagaga:

***i O le sulugatiti o le upu moni.*** I le taua lona lua a le lalolagi, na lele mamao ese ai se vaalele tau, mai le nofoaga faamoemoeina. Aisea? Ona o ona pailate, sa latou lē iloa le malosai o le savili i tua o le vaalele, na latou lē talitonu ai i faasinoga a uati ma mita o vaai i ai i o latou luma. O le i’uga na maliliu uma i latou. O ni tausaga mulimuli ane, na toe maua ai le vaalele ma iloa ai, sa lelei atoatoa lava meafaigaluega o mita ma uati faasinoina. Mo le taua faaleagaga, ia e talitonuina le Afioa Paia a le Atua, le Upu moni e faasinoala i soo se mea. Ia faitau ai i aso uma ma talitonu i ai, tusa po o a ou lagona ma ni ou manatu e tupu a’e ma fai atu.

***ii O le ufifatafatafa o le amiotonu.*** Ia maitau mai o le amiotonu, o le amiotonu a le Atua, a e lē o oe. Ua lē faaolaina oe ma a’u ina ua talitonu i a tatou lava galuega, a o le talitonu i le galuega faaola na fai e Keriso i luga o le satauro. Pe afai e te iloa manino ma mautinoa lena mea, ona avea

lea o le amiotonu a le Atua e fai ma ufifatafata e puipuia lou fatu, lou loto ma le agaga, mai vaivaiga o le masalosalo ma le faalotolotolua faasino i lou faaolataga. (“<sup>21</sup>Auā o Lē na lē iloa le agasala, na faia o Ia e le Atua ma agasala, mo i tatou; ina ia avea i tatou ma amiotonu a le Atua ia te Ia.” 2 Kori. 5)

***iii. O seevae o le sauniga o le tala lelei o le filemu.*** O seevae latou te ta’u mai le savali ese, e alu malaga i se isi nofoaga. O lea, ‘aua e te faamoemoe e faalogo atu i se upu mai le Atua, pe afai e te nofoa’i, ma nofonofo maalili tumau ai i le mea e tasi. Pe afai e amata ona e malaga aga’i i luma, na te faamaonia mai le sagatonu o le itu o e faasaga i ai, i Lona tuuina atu ia te oe o le faalogona o le filemu (Kolose 3, “<sup>15</sup>Ia pule foi le filemu mai ia Keriso i o outou loto...”)

Pe afai e aunoa oe ma se filemu i soo se mea, ia fesili i le Atua mo lana faasinoga. Aemaise lava pe afai o oe o se tagata e naunau e amatamea ma fiafia i mea e te faia. E finagalo le Atua ina ia e mauaina ma ia nofomau i totonu, le lagona o Lona filemu – o le mea lea ia ‘aua e te alu e aunoa ma lena. “<sup>13</sup>Pe a uma foi ona outou faia o mea uma (le taua), tou te tutumau ai lava.” Efeso 6.

***iv. Tago atu i le talipupuni o le faatuatua. (Efe 6:16).*** O le a le aogā o le talipupuni? “<sup>16</sup> tou te mafai ai ona tinei o u fanafana mu uma lava a lē o loo leaga.” E i ai ata tifaga kaupoe o aso la, i vaiga masani pe a fai le taua a tagata totino Amerika (Initia), ma tagata ese o loo o atu e fia nonofo i totonu o laueleele ma fanua. E faataamilo solo tagata ese e li’o a latou taavale solofanua, a o tagata o le laueleele latou te tafana atu u fanafana mu i totonu o le li’o o taavale solofanua ma tagata.

E tau fai malamalama uma itutaua e lua, e lē mafai ona e faasaga atu i le afi o mu, ma faasaga atu i le fili i le taimi e tasi; o u fanafana e mu ma le afi, ua na o se auala e faalavelave ma ta’ta’i ese mai le mafaufau ma le vaai. E faapena togafiti a Satani, ina ia faalavelaveina ai oe. Peitai o le faatuatua, ma le faasaga i Afioa a le Atua, o le talipupuni lena mo soo se u fanafana mu.

**v. O le puloutau o le faaolataga.**

O le pulou lenei na te puipuia lou ulu, lou mafaufau. Pe afai e musumusu atu Satani ia te oe, ‘Afai o oe o se Kerisiano faamaoni, sa lē tatau la ona e...’, e mafai ona e tineia ana osofaiga ina ua e iloa mautinoa lou faasinomaga ia Keriso – o oe o se tagata ua uma ona faatauina i le toto o Keriso, ua uma ona faamagaloina ma faata’ele mamā i le toto ma le vai na maligi mai lona itu i luga o le satauro, ua ta’uamiotonuina ai i le silafaga a le Atua, ma ua e nofo sauni e feiloa’i i le lagi ma lou Faaola.

**vi. O le pelu a le Agaga, le Afioga a le Atua.** O le afioga a le Atua o ta’ua iinei, o loo faamamafa ai le tautala atu, folafola atu, molimau atu e ala i afioga tusitusia a le Atua. O le valaau ina ia ta’utino atu le upu a le Atua e faatoilalo ai Satani ma ana ‘au, ina ua sii mai o mau talafeagai, i le taimi talafeagai, i le nofoaga e fetau, ma le faalavelave tonu o tula’i mai. O le ala lena e tau malosai ai Satani, auā na te iloa foi nisi upu tusia i le Tusi Paia. E faatolu ona ia osofa’ia Iesu i le vao, i lona sii mai o upu tusia, a e faatolu foi ona fetalai Iesu, “*O loo tusia...*” Na matua’i olopalaina e Iesu ia Satani e ala i le ta’u atu i ai o le Tusi Paia. E mafai e Satani ona finau ma faafinau i nisi mataupu, peitai e leai sana puipuiga faasaga i Afioga a le Atua. O le mea lea ia faitau, tauloto, teufatu ma apalai afioga paia a le Alii, o le auupega e faatoilalo ai le fili.

## **IA SUIA, IA FAAFU**

*“17 O lenei, afai o ia Keriso se tasi, o le tagata fou ia.”*

O i ai se mea o lou olaga o fia sui? E tatau ona i ai, auā o le umi ona e tumau i se mea e tasi, o le tuai lava lena, e tatau ona faafou! Ia faafou pea lava pea, e ala i le faalelei atili, faalautele teisi, siisii i luga, ia ausia se isi laasaga fou. Pe afai foi e te manatu o loo lelei mea uma, ona faapea lea o le fesili – o le a se mea o loo mana’o lou toalua, lau uo, au paaga, o uso i le galuega, ina ia suia o lou olaga? Atonu e sili atu lena ona iloa gofie ai le manaomia o ni suiga faafou ia te oe. Auā o le upu masani, e lē iloa e le tagata lona sesē, ma ona faaletonu se’i vaganā ua iloa mai e le isi tagata. O le natura foi o le tagata e musu

tele e sui ni mea ua masani ma fiafia i ai. E faaupu e Ieremia faapea, “*23 E mafai ea ona liua e le Aitiupe o lona pa’u, pe liua e le nameri ona ila? A mafai lea, ona mafai foi lea ona amio lelei o outou ua masani i amio leaga.*” Iere.13. Atonu foi ua e fiu e tau sui e lē mafai, ma ua tauau ina leai sou faamoemoe e mafai ona suia. Peitai, e leai! E leai se mea e faigata i le Atua. O tulaga na e galue ai le mana-sui-tagata o le Atua. Fai mai le aposetolo ia 2 Kori. 5, “*17 O lenei, afai o ia Keriso se tasi, o le tagata fou ia; ua mavae le ola tuai, faauta, ua oo mai le ola fou.*”

O le taimi lava e te ta’utino ai o Keriso lou Alii ma lou Faaola, tautino lou faatauva e te lē mafai se mea vagana le mana o le Alii, ona tutupu lea o vavega i lou soifuaga atoa. Ua e lē toe tutusa, ua amata le ola fou. E ta’ua e le Tusi Paia le suiga lena, o le toe fanaufouina. Ua fou le natura, aemaise le Agaga Paia e afio ai i totonu o lou agaga – pei o se seti o maa fou ua faapipii e ola ai le paoa. E pei ona amata lou ola i la le tino, i le aso na e fanau mai ai i le lalolagi, e faapena ona amata lou ola fou, ina ua toe fanaufouina ia Keriso. Ma e sosoo mai ai ma le faasologa o tualumaga o le olaga o le tagata ua suia ma fanaufouina. O loo faamatala e le aposetolo ia Roma 12 nei tualumaga e faapea, “*2 ‘Aua foi tou te amio faatasi ma lenei lalolagi, a e peitai ia liliuina i le toe fuata’iina o outou loto, ina ia outou su’esu’e pe se a le finagalo o le Atua, o mea ua lelei, ma le mālie, ma le atoatoa.*”

Pe afai foi e uma ona e toe fanaufouina, ma ua suia faafou lou soifua, e i ai foi ma ou tiute fou ma tofi fou ua valaauina ai. E aofia ai la tatou misiona fai faatasi, o le faafanaufouina lea o nisi tagata, nisi agaga o loo faapogisaina pea e le tiapolo, ia ‘aua ne’i iloa le malamalama o le Tala Lelei o le faaolataga ua faia e Iesu Keriso. E galue le Agaga o le Atua e auala atu i a tatou feau, o agavaa ma taleni ua foaiina mai. Na fetalai le Agaga ia Filipino, “*29 Faalatalata atu ia, ma e faatasi i lena taavale.*” Galu.8. Na alu atu Filipino, ua fesoasoani e faamalamalama i le eunuka Aitiupe le Tusi Paia na ia faitauina. Na iloa ai e lena eunuka o Iesu Keriso le Mesia puapuagatia na maliu e faaola o ia, a e le o Isaia. Na ia ta’utino, “*Ou te talitonu, o Iesu Keriso o le Alo o le Atua ia.*” Na papatisoina o ia i lena lava aso, ua toe fanaufouina lona olaga, ona o le galuega a le Agaga Paia, e ala atu i le tiakono o Filipino.





*Le EFKS Ketesemane fou, i totonu o le Maota fou o le Galuega.*



*Sui o le Komiti Tupe i la latou asiasiga i nisi o galuega a le Ekalesia (ata Galuefa Leilua FS)*



*Maa Fou Ioane Viliamu, Apia*



*Fale fou Faatonu Aoaoga Kerisiano, Malifa*